





1617

7^e. Carle 1712

2375

LE
P R I N C E
A B S O L V.

A P A R I S.

M. DC. XVII.

Case

F

39

. 326

THE NEWBERY
LIBRARY

1617pr2



AV ROY.

SIRE,

Encore que vostre Majesté peüst dire du feu Roy d'immortelle memoire, ce que l'Empereur Tybere disoit d'Auguste, *qu'il n'y avoit que son seul esprit qui fust capable d'un faix si pesant, qu'est celuy du gouvernement de la Republique* : Si est-ce que la France vous voyant aujourd'huy le Sceptre à la main, ose esperer que vous ne serez pas moins heritier des rares vertus d'un si bon Pere, que vous estes legitime successeur de ses Couronnes, & que si les Payens adoroient le Soleil dès l'aube du iour, comme vne Deité imaginee de laquelle ils attendoient tout leur bon-heur : Nous pourrions à plus iuste sujet, & sans soupçon d'idolatrie, jeter nos yeux sur vostre Majesté, comme sur un Astre naissant, duquel nous auons à recevoir l'influence d'une continuelle prosperité. Car puis que les peuples prennent du Prince: comme d'un moule public, la forme de toutes leurs actions, changeans & rechangeans leurs mœurs avec les siennes, vous nous serez un exemple si parfait, que semblable à vos predecesseurs, vous porterez les tiltres glorieux, DE CONQUERANT, DE SAGE, DE GRAND, DE DEBONNAIRE, ET DE PERE DU PEUPLE. Tiltres vraiment heroïques, & qui immortalisent le nom de ceux qui en ont esté honorez : Mais le vray caractere qui fait discerner vostre Majesté d'entre tous les Roys de la terre, & qui fait que vous les surpassiez en grandeur, est le tiltre sacro-sainct de Roy TRES-CHRESTIEN, acquis à vos ayeulx, pour leur

zele incomparable enuers la Religion. C'est pourquoy, SIRE, marchant sur leurs pas, nous verrons en nos iours fleurir si heureusement la Pieté sous la douceur de vostre Empire, que la France sera comme vn Temple sacré où le seruice de Dieu se maintiendra en son ancienne pureté. A cét effect vous sçaurez par vostre prudence, faire tousiours vne telle élection des Prelats de l'Eglise, qu'ils se rendront autant venerables par l'innocence de leur vie, que par l'eminence de leur sçauoir, sans souffrir que les ignares, non plus que les vicieux, s'approchent de l'Autel, & polluent les choses saintes. Car ne doutez point, SIRE, que les Princes n'ayent à respondre au iugement de Dieu, du mauuais exemple, & des scandales que les Pasteurs donnent à leurs troupeaux. Apres les auoir donc choisis à la marque de leur merite, & probité, vous leur sçaurez rendre la reuerence qui est deuë à leur Onction, ce respect ne se rapportant pas seulement à leurs personnes, mais au Roy des Roys, duquel ils ont l'honneur d'estre Ministres. Ainsi vos predecesseurs, dont l'histoire celebre la pieté, ont grandement deféré à cét Ordre, voire iusqu'à l'honorer quelquefois de la Regence du Royaume, sans se figurer qu'en cela leur Majesté fust diminuéee, ains ils estimoient que les graces du Ciel en découloient sur leur chef, avec la benediction & bien-vueillance vniuerselle des peuples, lesquels croyent aussi ne pouuoir iamais recevoir rien d'iniuste ny d'insupportable d'un Prince religieux. Pourtant, SIRE, vous n'estimerez point pecher en l'excez du respect que vous deférerez à des personnes de ceste qualité, puis qu'il n'y a à redouter en eux aucun establissement temporel, parce qu'ils ne se reueussent que de ce qu'il plaist au Prince de leur attribuer par sa pieté, sans qu'ils l'vsurpent par

aucune ambition. Ioint que tout ce lustre externes'esteint en leurs personnes, & n'est fuiuy d'aucun de leurs maisons qui le releue apres eux. Anciennement Le (dit l'histoire) en toutes chartres & tiltres des Roys, l'ad-sieur dresse estoit aux Prelats, puis aux Ducs, Comtes & autres, du & la souscription premiere d'iceux, aux Prelats: Mesme au Til-Sacre & Couronnement du Roy Philippe premier, les Prelats approuuerent ledit Roy les premiers, qui estoit la façon du temps, & sont nommez auant les Laics. En celuy du Roy Louys onzième, les Pairs d'Eglise, & autres Prelats, prece-derent les Pairs, Laics, & autres Princes, Ducs, Comtes & Seigneurs, & furent en l'Eglise audit acte, & au disner assis à la dextre du Roy, les Pairs & autres Laics à la fenestre, & a esté ainsi obserué à tous les autres sacres & Couronnemens desdits Roys. La mesme histoire parlant aussi de la seance des Prelats aux Estats generaux du Royaume, remarque, qu'en ceux de Tours par ledit Roy Louys onzième le Cardinal Baluë fut assis au costé droit du Roy, sur vne chaire couuerte de drap d'or sur velours cramoisy, les autres Prelats de mesme costé: Et sur autre chaire semblable, au costé gauche fut assis le Roy René de Cypille, Duc d'Anjou Prince du sang, & dudit costé les autres Princes, Ducs, Comtes & Seigneurs Laics. Elle adioust encore, que l'annee 1377. l'Archeuesque de Rheims, vn Euesque d'Allemagne Chancelier de l'Empereur Charles quatrième, & l'Euesque de Paris, furent en vn disner assis, au dessus de l'Empereur, du Roy Charles cinquième, & du Roy des Romains fils de l'Empereur: Mesmement, à l'entree du Roy Henry second, les Princes plus proches de la Couronne Laics querelloient pour s'asseoir à la dextre du Roy, voulans que les Princes du sang d'Eglise fussent à la fenestre, ledit Roy honora l'Eglise de sa dextre. De sorte, SIRE, que vos predecesseurs, selon le plus ou moins de leur zele enuers l'Eglise, ont donné rang aux Ec-

clesiastiques, ceste reuerence ayant tant seruy à leur reputation, & à l'heureux gouuernement de leur Royaume, que les Prelats demeurans ainsi en rang
ibid. eminent, estoient comme interposez entre les Roys & les Grands del'Estat, pour les contenir en leur deuoir, & les y attacher par les liens de la conscience, liens beaucoup plus forts que n'est la terreur de toutes les loix humaines. Ce que i'en represente à vostre Majesté, est plus pour luy faire admirer la grande deuotion de ses Peres, que pour l'induire à redresser ces anciens degrez d'honneur en faueur des Prelats de ce temps, estimant que leur modestie & humilité est telle, qu'il pourueu que Dieu ne soit mesprisé en eux, & que les ennemis de l'Eglise ne s'en orgueillissent de leur rebut, ils n'auront iamais ambition d'estre plus honorez dans le monde qu'ils sont.

Vostre Maiesté ayant donc esté si soigneusement esleuee en son bas aage, qu'elle a succé la pieté avec le laict, elle craindra Dieu toute sa vie, & l'aymera de toute son ame, parce que c'est ce seul grand Dieu qui allonge & accourcit comme il luy plaist la vie des Roys, & qui tenant leur cœur en ses mains, l'encline où il veut. Et si avec le tiltre de *Roy tres-Chrestien*, vostre Majesté s'honore encore de celui de *Fils aîné de l'Eglise*, elle tesmoignera par toute forte de submission, l'obeissance qu'elle doit au Chef visible de ceste Espouse, iettant humblement son Sceptre & sa Couronne aux pieds de la Croix du fils de Dieu, que ce souuerain Pasteur represente icy bas en terre. Les Constantins, les Theodoses, vn Clouis, vn Charlemagne, & les autres Roys vos deuanciers vous ont laissé assez d'exemples de leur deuotion enuers le saint Siege, pour vous animer, SIRE, à ne leur ceder en ce deuoir. Partant si en nostre siecle corrompu il

y a des esprits chagrins & contentieux, qui ayans la voix de Iacob, & les mains d'Esaü, sement des discours au desaduantage de la reuerence deuë au vray successeur du Prince des Apostres, pour le mettre en ombrage aux Souuerains, & Potentats, vous sçaurez, SIRE, boucher vos oreilles au sifflement de telles viperes, sans apprehender que ce Pere commun de la Chrestienté, entreprenne iamais chose qui preiudicie au pouuoir absolu de vostre Majesté. Car outre ce que luy, & tout le Clergé de France prononce anatheme & damnation eternelle, à tous scele-rats & parricides qui osent attenter à la sacree per-sonne des Roys, ils sçauent que vous estes Souue-rain de toute sorte de Souueraineté temporelle en vostre Royaume, n'estant feudataire, ny du Pape, ny d'aucun autre Prince; & qu'en l'administration des choses temporelles, vous dependez immediatement de Dieu, & ne recognoissez aucune puissance par dessus vous, que la sienne: Mais si du Tribunal de l'Eglise, comme d'un Arsenal spirituel, ce grand Pon-tife lance quelquesfois des foudres contre les Princes heretiques, & persecuteurs de la Religion Catholi-que: vostre Majesté n'a pas à les craindre, parce que vous estes heritier de la Couronne, & du nom, & de la foy de ce glorieux S. Louys, qui estoit l'appuy de l'Eglise & l'abry & la retraicte des Papes. C'est pour- quoy, SIRE, vous estes inseparable & indiuisible de l'union & de l'amitié du Siege Apostolique, & con-nié par toutes raisons, & spirituelles & temporelles de la maintenir. Aussi le Pape Paul qui sied aujour-d'huy, estant Parrain de V. M., & comme son second Pere, s'employe par toutes sortes de soins & d'offices, à procurer enuers Dieu & les hommes, le bien & la cōseruation de V. personne & de V. Royaume. Bref,

SIRE, souuenez-vous, (ainsi que l'a tres-elegamment escrit, vne des grandes Lumieres de l'Eglise) que comme quand l'Arche de l'Alliance residoit en la maison d'Oreb-Edon, il n'y auoit espee de felicité qui ne luy arriuaſt : Ainsi pendant que la communion du Siege Apostolique a esté parmy nous, & que nous auons eu l'assistance du Vicaire de celuy qui est la vraye Arche d'alliance, toutes sortes de prosperitez nous sont arriuees. Le nom Francois s'est espandu d'un bout du monde à l'autre, & nos lys ont fleury aux plus loingtains parties de la terre. Et au contraire, lors que nos Roys ont esté separez de l'union du Siege Apostolique, le lys a esté entre les espines, & toutes sortes d'angoisses & d'aduersitez nous ont assiegez. Les Palais appartenans donc aux Roys, & les Temples & les Autels aux Prelats, vous tiendrez lieu d'ouaille en l'Eglise, & non de Pasteur, prenant l'encensoir à la main, & vsurpant l'authořité de la Religion, comme vn Roy Ozias qui fut frappé de lepre pour ce sacrilege. Vous desirerez seulement que vos peuples vous rendent ce qui appartient à Cesar, sans vous donner ce qu'ils doiuent à Dieu. Nous deuons beaucoup (dit in vn genereux Athlete de la Foy) au Roy estably sur nous Matt. de l'ordonnance de Dieu : Mais nous ne luy deuons rien que cap. nous ne deuions à Dieu; duquel il est Lieutenant, & nous 25. deuons beaucoup de choses à Dieu, que nous ne deuons pas au Roy. Nostre deuoir enuers le Roy est borné, & enuers Dieu nostre deuoir n'est iamais acheué. Au Roy nous deuons beaucoup, à Dieu nous deuons tout.

Or, SIRE, d'autant qu'apres le vray culte de la Religion, & la reuerence deuë à vos Peres spirituels, l'honneur & le respect qu'un Prince Chrestien doit à ses Parents, est encores vne des marques principales d'une parfaicte pieté, la France a sujet de s'eslouyr & de vous benir de la tendre & cordiale amitié que
vous

vous auez tousiours témoignée à la Reyne vostre Mere, à laquelle outre la naissance, vous vous ressentiez estroitement obligé du soing particulier que ceste grande Princesse a tousiours eu de vostre personne, & de vostre Estat, l'ayant si bien regy durant vostre minorité, qu'elle se peut glorifier qu'il ne s'est jamais passé Regence plus heureusement que la sienne, ce Royaume durant ce temps-là n'ayant esté troublé, ny agité d'aucunes guerres ciuiles. C'est pourquoy on luy peut iustement attribuer la mesme loüange que Phocion se donnoit, *d'auoir si bien conduit sa Republique, que durant son administration les Atheniens n'auoyent eu autres sepultures que celles de leurs Peres*, tant ceste sage Princesse sçeut obliger vos sujets par toutes sortes de liberalitez, pour les contenir en deuoir apres le déplorable decez Du Grand Henry vostre Pere, ainsi que les Estats generaux luy témoignèrent par les eloges & actions de graces, dont ils loüerent & celebrerent son gouuernement à l'entree & à la closture de leur Assemblée. Depuis, le mal-heur a esté pour elle & pour toute la France, que Tels qui deuoient se cognoistre & n'abuser de la felicité de leur fortune, se sont neantmoins ingratement & insolemment portez enuers elle, se rendans indignes des graces, des honneurs, & des biens-faits dont elle les auoit comblez. Surquoy vostre Maiesté la remerciant de ses labeurs passez, a eu pour agreable qu'elle se repose maintenant en sa solitude, où receuant tout le gracieux & fauorable traitement qu'un fils bien né doit à vne Mere si vertueuse, elle prie Dieu incessamment pour vostre prosperité, pour la paix & grandeur de vostre Estat. Tresmarrie qu'elle est de ne vous l'auoir rendu plus florissant, ce qu'il y a à desirer estant plustost arriué par l'artifice & par l'illusion d'autrui, que non point par

mauuaife intention qu'elle ayt iamais euë enuers ce Royaume, la candeur & sincerité de ses actions estant cogneuë de Dieu & des hommes vuydes de passion.

2. part *au pr. sent royal.* Finalement, SIRE, vsant du propre langage du Serenissime Roy de la grande Bretaigne, au feu Prince de Galles son fils, ie diray à vostre Majesté, *que puis qu'elle a l'authorité de Magistrat legitime, elle ne souffrira point que ceux desquels elle a l'honneur d'estre issuë, & qui auront eu puissance & authorite sur elle, soient calomniez par qui que ce soit, mesmement puis que le fait vous touche aussi en particulier, pour ne laisser à ceux qui viendront apres vous, sujet de vous traiter à la mesme mesure que vous aurez mesuré les autres.*

Dauantage, SIRE, la personne de MONSIEVR, qui est comme le bras droict de vostre Majesté, estant si dignement esleuëe pour se rendre capable de la seruir vn iour, aura en vous vn second Pere pour le protéger, comme vous fairez aussi Mesdames, & les Princes de vostre sang, afin qu'accomplissant ainsi les commandemens de Dieu en leur premiere & seconde table, vous cueilliez abondamment le fruct des promesses spirituelles & temporelles, faictes à ceux qui les obseruent religieusement.

Encores, SIRE, qu'il fust à desirer pour la gloire de Dieu, que vos peuples fissent profession d'une mesme Religion, & qu'ils adorassent tous sous la voule d'un mesme Temple, parce que là où la diuine Majesté est diuersement seruie, celle des Roys qui en est l'image viuante, est tant moins craincte & reuerée : Si est-ce que puis qu'il a pleu à vos predecesseurs de leur permettre par leurs Edits, la liberté de conscience, vostre Majesté la leur maintiendra inuiolablement, sans souffrir qu'on en altere la grace & le benefice. Si bien que lestraiçant esgalement sans aucu-

ne distinction d'eux aux Catholiques, puis qu'ils sont tous vos sujets, ils participeront aux charges & honneurs du Royaume, les faueurs particulieres de vostre Majesté ne leur estant mesme déniées, tant qu'ils s'en rendront dignes par leur fidelité, & affection au bien de l'Estat: Mais s'il y a entr'eux quelques esprits turbulens, qui non contents des grands auantages qui leur sont concedez par les Edits de pacification, notamment par celuy du feu Roy vostre Pere, ils vouloient innouer & se porter à des demandes & pretensions excessiues, ou visiblement preiudiciables à la Religion Catholique, & à l'autorité Royale, vostre Majesté les sçaura lors renfermer dans leurs iustes limites, & leur faire sentir qu'estant apres Dieu l'vnique protecteur de la Cause de l'Eglise, vous la garantirez de leur oppression, comme aussi vostre Royaume de toutes les semences d'vne miserable Anarchie, lesquelles n'estans estouffées à leur naissance, montent quelquefois à vn si haut degré de rebellion & de desobeyssance, qu'elles desolent les plus puissantes Monarchies.

Vostre trône ayant donc la Pieté pour principal appuy vous regnerez vrayement en Prince absolu, parce que vos commandemens ayant la Loy de Dieu pour regle souueraine, seront accomplis avec tant d'obeissance, que l'enfant debonnaire ne ploye pas plus tost à la volonté du Pere que vous serez craint, seruy & honoré d'vn chacun, vous souuenant sur tout, que les Roys doiuent tousiours estre plus religieux que leurs subjects. Car ils ont beaucoup plus d'allechemens de pécher que non pas eux; n'estans punis des hommes, mais de Dieu seul. Ioinct qu'ils pechent autant par l'exemple qu'ils donnent, que par le mal qu'ils font: Mais d'autant qu'avec la Pieté, la Iustice est la

seconde colomne qui soustient les Monarchies, vostre Majesté la fera soigneusement administrer à ses peuples, leur donnant des Magistrats qui soyent gents de science & de conscience, qui oyent les cris de l'orphelin, & ayent commiseration des larmes de la veuve. Tels vostre Majesté les sçaura choisir, quand elle aimera la Justice, & aura souuent à la bouche ceste sentence qui est plus pure que l'or fin. *Encores que ie puisse tout, si n'y a-il que les choses justes qui me soient permises.* En quoy vous imitez ce Grand Monarque, à qui vn Courtisan vouloit persuader, que tout estoit juste aux Roys : *Ouy bien* (luy respondit-il) *aux Roys des Barbares.* Aimant ainsi l'équité & la droicteure, elle abondera en vostre maison, & de ceste source les ruisseaux s'en épandront jusques aux extremités du Royaume. Le Magistrat fera aussi tant plus autorisé enuers vos Peuples, quand vous l'honorerez & armerez son bras pour le rendre formidable aux méchans : vos Cours souveraines estans principalement establies pour protéger les innocens, & pour venger leurs iniures contre tous ceux qui les oppriment. Pourtant, SIRE, ces celebres Compagnies-la auront en vostre Majesté vn tel soustien & appuy, que fortifiées toujours plus de vostre autorité, elles feront autant de rempars inexpugnables pour la defense de la Religion & de l'Estat. Or d'autant que la venalité des Offices est vne breche par où il entre beaucoup de mal au Royaume, vous en corrigerez l'abus tout autant que vos affaires le pourront permettre. Car qui achette en gros peut estre tenté de vendre en detail. C'est ce qui porte quelquefois le Financier au larcin, le Justicier à la corruption des presens, & le Guerrier à la violence & à l'exaction. Ce seroit aussi chose bien plus louable de rendre l'honneur & le pris

à la vertu , auanceant aux charges & offices ceux qui n'ont autre degré pour y monter que leur seul merite.

La Clemence, S I R , vous fera pour interprete de la Loy, & retiendra en l'air le glaive de la Iustice. Il a tué dit la Loy. Il l'a fait son corps defendant & sans y penser dira la Clemence, ou bien il a tué celuy qui auoit mis à mort son propre Pere, ou quelqu'un de son sang : Mais sous couuerture de Clemence, vostre Majesté ne fera iamais vne iniustice, elle ne luy seruira point de masque, elle ne luy prestera iamais sa robe à si mauuaise fin. En pensant à la douleur & au supplice d'un particulier, vous peserez l'interest public, & la consequence de l'impunité. Car il est autant abominable deuant Dieu d'absoudre le meschant que de punir l'innocent : & le Prince, (disoit le sage Emile), *qui ne reprime point le mal, semble le commander luy-mesme.* Viuant ainsi vostre Estat sera grandement heureux, les Romains n'ayans iamais acquis l'Empire du monde, que parce qu'ils sacrifioient souuent en leurs Temples, & estoient grands zelateurs de la Iustice, selon la louange que leur en donnoit l'Empereur Seuer, le premier leur rendant les Dieux propices, & le second *conseruant leurs Peuples en amitié & subiection.* C'est pourquoy le valeureux Roy Clouis qui embrassa le Christianisme, s'enquerant de saint Remy, duquel il receut le Baptisme (combien dureroit ceste Monarchie, tout autant de temps, (respondit-il) *que la Religion & la Iustice y fleuriront, parce qu'en tout l'Estat où le crime est pardonné voire recompensé, & où l'on ne delibere point si l'honneur de Dieu y est conserué ou non, il n'en faut attendre qu'une horrible subuersion.*

Et d'autant, S I R , que les Roys ne regnent par la seule force des bras, mais avec la prudence & sagesse

de l'entendement, vostre Majesté aura tousiours pres d'elle de bons & fideles Conseillers qui aiment la grandeur du Royaume, qui en espousent genereusement la defense, & qui n'estans touchez d'autre interest, ny meus d'autre passion que du bien public, vos subiets reposent sous leurs veilles, & l'Estat recoiue vne si profonde paix, que comme ceux qui auoient vescu sous l'Empire d'Auguste se reputoient heureux, qu'aussi vostre regne nous comble d'une telle felicité, qu'il puisse estre non seulement comparé au plus tranquille siecle d'aucun de vos predecesseurs, mais qu'il le surmonte en toute sorte de prosperité. Et si vne Republique est plus asseuree là où le Prince est mauuais, que là où les Ministres le sont, combien nous deuons-nous esioiir de ce que le Ciel nous preservant de ces deux inconueniens, nous a donné auioird'huy vn Roy très-vertueux, & encores assisté du mesme Conseil dont le *Grand Henry* son Pere s'est tousiours seruy?

Puis qu'il a donc pleu à Dieu, SIRE, de vous conseruer iusques à present, ces graues & venerables Vieilards pour vous aider maintenant comme Pilotes tres experts à conduire le vaisseau de ceste Monarchie, nous ne doutons point que vous n'ayez l'oreille attentiuement ouuerte aux sages Conseils qu'ils vous donneront pour vous faire surgir à bon port. Si bien que ne faisant rien d'important sans leur aduis, vous ne vous repentirez iamais de l'auoir fait. Ce seroit aussi chose tres dommageable au Prince, (disoit le Senateur Pompeianus) de demander conseil à qui ne le sçait pas donner, & encores pire, à qui ne l'ose dire, mais du tout mauuais de ne s'en sçauoir aider apres l'auoir receu. Or vostre Majesté ne se peut mal adresser pour le premier chef, veu la grande suffisance

& capacité de ces dignes Personnages vieillissau man-
niement des affaires de cest Estat, & pour le second
vous estes doüé d'un naturel si doux & si debonnaire,
que vous prendrez tousiours en bonne part l'honne-
ste & respectueuse liberté de leur conseil, là où il ira
du salut de vos Peuples, & de la gloire & reputation
de vostre nom. Aussi les fideles Ministres d'un grand
Roy, tel que la nature vous a fait naistre, doiuent
tousiours plus parler à sa personne qu'à sa fortune,
d'autant qu'il seroit trop malheureux, si par vne las-
che complaisance ou timidité seruire ils ne luy osoient
librement donner aduis de ce qui regarde le bien de
ses affaires, dont l'ignorance luy causeroit quelques-
fois des pertes irreparables. Et pour le troisieme
point, qui regarde de se preualoir d'un bon conseil
apres l'auoir recen, vostre mesme debonnaireté fera
que vous en tirerez toute sorte de fruiet : Mais tout
ainsi, SIRE, qu'on dit que les Egyptiens auoient ce-
ste coustume que d'exposer leurs malades à la venë du
public, afin qu'un chacun contribuast ce qu'il pour-
roit à leur guerison : De mesme, exposant les affaires
du Royaume aux yeux des Princes de vostre sang, &
des autres Grands que vous en estimerez dignes, tant
Ecclesiastiques que Laiques, vous les admettrez en
vos Conseils, & vous seruirez de leurs aduis, afin d'au-
thorizer d'auantage les resolutions qui seront prises
pour le bien de l'Estat. Car la reputation que cest or-
dre apportera dans les Prouinces, fera que vos peuples
obeiront plus volontiers à ce qui aura esté arresté par
vne si solemnelle deliberation. Ioinct qu'il y aura
tousiours moins de murmure & de ialousie entre les
plus notables de vos subiects s'ils se voyent honorer
de la creance que vostre Majesté aura en eux; chacun
se ressentant comme obligé à l'execution des conseils

où il aura participé, la mauuaïse coustume de plusieurs de nostre nation, estant de censurer volontiers la resolution des choses où ils n'ont pas esté appellez. Ce corps ainsi composé de tant de celebres personnages rendra vostre Majesté tant plus Auguste, laquelle embrassant aussi les conseils de la vraye prudence, exposera ses actions au iour, & reiettant toute sorte de caualation, comme indigne d'un grand Roy, ne fera rien qu'à descouuert, & qu'elle ne vueille que tout le monde sçache. Non pas, SIRE, qu'il n'y ait de certains mysteres au gouvernement d'une grande Monarchie, qui desirent le secret & le silence, & qui pour n'estre esuentez, ne doiuent pas estre proposez ny resolu en un conseil ouuert, desquels neantmoins tout homme sage & discret ne doit auoir la curiosité de s'enquerir plus auant que de ce qu'on luy en doit communiquer. C'est là où la prudence de vostre Majesté sçaura apporter le temperament qu'elle iugera estre plus à propos, donnant sur tout ceste impression à ses peuples, qu'elle agit de soy-mesme, & que de plusieurs conseils, soient publics ou particuliers, elle sçait tousiours eslire & suiure le meilleur, sans les espouser par faueur ou par passion, celuy des vieux estant vrayement preferable à celuy des ieunes & moins experimentez.

Comme un grand Prince disoit donc, qu'il aimeroit autant faire une oeuvre digne de reprehension deuant les Dieux, que de soutenir une mauuaïse opinion deuant Vlpian ce sage Iurisconsulte: De mesme vostre Majesté, cedant au fidele conseil de ses bons seruiteurs, ne se roidira iamais à faire chose d'importance contre leur aduis & iugement. Ce n'estoit pas aussi sans sujet que Cesar s'estonnoit de ce qu'Alexandre disoit qu'il ne sçauoit plus que faire, apres auoir conquis la plus grande partie du monde

monde, comme s'il y auit moins à faire à bien regir & gouverner vn Royaume, qu'à l'acquérir. C'est pourquoy. SIRE, vous seruant de toutes pieces pour vous acquitter tant plus dignement d'une charge si pesante que celle que vous auez sur les bras, les bons liures vous peuuent encores seruir de fidelles Conseillers: car ils vous instruiront sans craincte ny caiolerie quelconque, vous representant au naif quelle est la gloire des Princes vertueux, & quel est le blasme de ceux qui s'abandonnent au vice. Prenant plaisir de vous les faire lire, & de vous en entretenir quelquesfois, cela vous inspirera insensiblement vne certaine pointe & generosité qui ieschaufera vostre courage à imiter toutes les glorieuses actions de tant de Heros que l'histoire celebre ne plus ne moins que le mesme Cesar disoit, qu'il estoit touché du seul portraiçt d'Alexandre. *Apprens doctrine dès ta ieunesse (dit l'Escripture) & Eccl. tu trouueras sagesse, qui te durera iusques à ce que tu ayes ch. 6. les cheueux blancs. si tu aimes d'ouir, tu receuras prudence. Si tu enclines ton oreille, tu seras sage.* Aimant ainsi les bons liures, ceux qui font profession des lettres seront en estime aupres de vostre Majesté, laquelle sera en nosiours le vray Restaurateur des Vniuersitez, que les Roys ses Predecesseurs ont fondées pour l'vtilité & pour l'ornement du Royaume, parce que la ruine & la decadence n'en seroit pas moins honteuse à leurs successeurs, que la fondation leur en a esté glorieuse.

Auec la Religion, la Iustice & les lettres, le Prince se rend encores plus redoutable, s'il aime les armes, s'il recueille fauorablement les gents de ce mestier, & qu'ayant dequoy s'opposer à ses ennemis on perde l'enuie de l'attaquer, toute paix desarmée estant volontiers foible. Vostre Majesté est ysluë d'un Pere

trop valeureux pour auoir besoin d'estre excitée à ceste grandeur de courage , puis que les forts engendrent des forts, les Aigles des Aigles, & non des colombes craintiuës. Semblable donc à ce grand Mars, vous porterez la foudre à la main, vous entreprendrz sur vos ennemis, vous vous deffendrez s'ils vous assaillent, & departirez les charges de la guerre à vos subiects, non tant pour le respect de leur naissance, qu'en consideration de leur propte valeur. ¶ Et comme le mesme Empereur qui ordonna des triomphes pour honorer les victorieux, fist aussi des loix pour chastier honteusement les pusillanimes: De mesme vostre Majesté recognoissant le merite & le guerdon pour freres, elle reputera aussi l'offense & la peine pour sœurs, c'est à dire, qu'il y aura en son Royaume de la recompense pour les braues, comme aussi du chastiment pour les lasches & perfides. Pour comble de benediction vous ferez que Dieu & les hommes soient tousiours temoins de la Iustice de vos armes. *Car pour conseruer (disoit le grand Scipion) la paix dans vn Estat, il ne faut rien faire d'iniuste, ny rien souffrir de honteux.* Et parce que la victoire mesme des guerres ciuiles, est dommageable aux Princes, vous ne les entreprendrez iamais qu'à toute extremité, & que l'honneur de Dieu & le salut de vos peuples opprimez, ne vous y force plustost que vostre interest particulier.

Les finances & le tresor du Prince estant encores vne des bazes principales sur qui repose l'Estat, le fond en doit estre si bien mesnéagé qu'il ne tarisse iamais, veu qu'un Prince necessiteux est moins craint de ses subiects & beaucoup moins redouté de ses voisins, tant peut sur les vns & sur les autres l'opinion qu'ils conçoient de sa puissance. Or comme on donne volontiers le commandement des armes aux plus

vaillans, aussi n'y aura il que les plus loyaux qui aient l'administration de vos Finances, de peur qu'en cuissant faire espargne vous ne fussiez desrobé. Non que pour amasser beaucoup d'or & d'argent on doive humer le sang & deuorer la substance des peuples, ains les traittent doucement, on en est beny de la voix du public, & les graces du Ciel se multiplient sur le chef du Prince, qui semblable au Berger se contente de la toison de ses brebis, sans les escorcher & en prendre la chair & la peau. C'est ce qui faisoit dire à vn vray Pere du peuple, *Qu'il gouuernerait la Republique de telle façon, qu'il apprendroit que c'est le bien du public & non pas le sien.* Aussi les subiects (au iugement de l'Empereur Pertinax) refuserent quelques fois de payer les tributs iustes & accoustumez quand on les charge d'imposts excessifs. Vous espargnerez donc, SIRE, non en rauissant le bien d'autrui, mais en n'espanchant vos Finances en dons immenses, ny en luxe, ny en despenfes superflues: Car estre contrainct d'arracher aux vns pour donner aux autres, ce ne seroit pas liberalité, ains ceste vertu changeant de nom, elle s'appelleroit iniustice.

Et d'autant SIRE, qu'on estime les Roys estre volontiers tels que sont ceux qui les approchent, vostre Majesté ne donnera accez ne credit aupres d'elle, qu'à ceux qui sont vrayement gents d'honneur, ayant mieux le parler libre d'un homme sage & discret, que le discours emmiellé des flatteurs, lesquels ne disent iamais au Prince ce qu'il est; mais beaucoup plus de ce qu'il n'est pas. Si bien que complaisans à l'oreille de leur Maistre, ils ne l'entretiennent que de ce qui luy agrée, ne touchent ses imperfections que pour les chatouiller, & le desguisant à soy-mesme, luy transforment ses vices en vertus, sa lascheté en clemence, son impudicité en galanterie, Brefils luy preschent que

ses parolles sont des oracles, & l'esleuant iusques au troisieme Ciel, luy font accroire qu'il est, non Officier, mais compagnon de Dieu. Fuyez donc *SIRE*, fuyez la rencontre de telles gens, comme celle du Bafilic qui tue de son seul regard, & que ce soit au témoignage interieur de vostre conscience que vous sçachiez au vray ce que vous estes, ou ce que vous n'êtes pas, imitant ceste Vierge (que dit Pline) laquelle se regardant en vn miroir, voulut tirer son portraict de sa propre main, pour fuyr la flaterie du Peintre.

La cour du Prince ayant à seruir d'exemple de pudicité à tout le Royaume, vostre Maiesté se commandera soy-mesme, ne plus ne moins qu'elle commande ses peuples, & estimera estre chose digne d'un Prince vertueux de ne s'asservir aux voluptez des sens, ains elle les domtera mieux que ses propres subiects, ne presumant point que tous doiuent viure reglement, & qu'il soit loisible à elle seule de s'abandonner aux plaisirs illicites, lesquels on ne sçauroit mieux vaincre qu'en les fuyant, comme l'on dit des Scites qui combattent leur ennemi en se reculant.

La faueur du Prince estant desirée de tous, vous la departirez avec tant de discretion, que faisant du bien & de l'honneur aux vns, vous ostiez aux autres toute occasion de ialousie & de mescontentement. Si bien que vivant en Pere commun de vos subiects, vous distribuerez les charges du Royaume, non tant par la recommandation & au gré d'autrui, que par la propre cognoissance que vostre Maiesté desirera auoir du merite de chaque particulier. Car ceste autorité Royale sera d'autant plus absoluë que nul ne recevra du bien que de la seule main de son Roy. Autorité *SIRE*, dont vous deuez sur tout estre ialous, comme estant le liët des Vestales, & la couche sans macule

qui ne souffre iamais de compagnon, n'estant pas d'el-
le comme du partage de Polux, qui se contenta de n'es-
tre que demy-Dieu, pour admettre son frere à la
ioüissance de son immortalité. Aussi la France est vn
corps qui ne respire & n'a vigueur que par vn seul es-
prit, ne plus ne moins que tout l'vniuers n'est illuminé
que d'un seul Soleil. Et comme Lyfander se plaignoit
au Roy Agefilaus, qu'il sçauoit fort bien abaïsser ses
amis: *Ouy bien* (luy respondit-il) *ceux qui veulent estre*
plus grands que moy: De mesme vostre Maïesté sçaura
humilier ceux qui s'en orgueilliront, & qui voudront
estre plus qu'ils ne doiuent, comme au contraire, elle
exaltera ceux qui humbles & debonnaires se contien-
dront en deuoir. Temperant ainsi vos faueurs, vous
ne tomberez iamais en l'inconuenient que la sœur de
l'Empereur Commodus luy reprochoit, disant, que
de simple Esclaue il auoit fait Cleander Seigneur:
Mais que de Seigneur il estoit deuenu luy-mesme Es-
claue, pour l'excez de la grandeur où il l'auoit esleué,
& laquelle en fin luy fut si suspecte, qu'il ne la peut
abbatre qu'en luy ostant la vie.

Considérez aussi (comme le Serenissime Roy de la *An*
grande Bretagne representoit à son Fils) *que la vertu ac-pres.*
compagne le plus souuent la noblesse du sang, & que la di-royal
gnité des Ancestres nous oblige à respecter ceux qui en sont z.
yssus. Pourtant, honorez les Seigneurs & Gentils-hommes part.
qui reuerent vostre personne, & qui obeissent à vos Loix,
parce qu'ils sont comme les Peres de la Patrie. Plus vostre
Cour sera remplie de telles gents, plus y aurez-vous d'hon-
neur, les employans mesmes en vos affaires plus importan-
tes. Aussi sont-ils les bras & les mains avec lesquelles vous
executez vos Loix & iustes volontez, Soyez donc gracieux
à qui vous obeira, & rigoureux à qui fera le contraire, afin
que mesmes les plus Grands viennent à croire, que leur plus

haut poinct d'honneur est à l'ennuy des petits de respecter vostre personne, & d'obeyr à vos commandemens, faisant sonner à leurs oreilles, que le premier seruice que vous desirerez d'eux, est que non seulement ils vous rendent ceste obeissance; mais qu'ils la facent aussi rendre par les moindres, & que sans cela leur seruice ne vous peut estre agreable. Ce mesme grand Roy desirieux de conseruer la Noblesse de ses Royaumes, & pour empescher qu'elle ne respande son sang dans des querelles particulieres, ne se deuant immoler que pour le salut de l'Ettat, disoit encor à son cher Fils, ce que vostre Maieité sçaura, Dieu *ibid.* aydant, accomplir heureusement: Ne cessez ie vous prie, que vous n'ayez osté & destruiect ces mal-heureux duels & deffis, afin que l'effect en soit aboly, & le nom mesme oublié.

Auec le support que le Prince tire de la force & bien-vueillance de ses subiects, encores a-il besoin de s'appuyer au dehors. Les alliances que fera donc vostre Maieité, seront fortes & puissantes, parce que de s'vnir & confederer avec des personnes foibles, ce seroit seulement chercher avec qui se perdre. Et pour conseruer l'amitié des Princes que vous iugerez dignes de vostre alliâce, procédez tousiours ingenuëmēt avec eux. Car comme on disoit du bon Traian, qu'un Prince peut bien estre hay, encores qu'il ne vueille mal à personne: Mais, que d'estre aimé il ne le peut estre si luy-mesme n'ayme: Ainsi n'attendez de vos Alliez rien de net, & d'affranchy, sinon qu'autant qu'ils se ressentiront obligez de vous rendre le change de l'amitié que vous leur tesmoignerez en l'accomplissement des traitez & des promesses où vous auez engagé vostre foy. Foy, dy-ie, qui fait honorer ou mespriser le Prince. Car l'obseruant religieusement, fust-ce mesme à son dommage, il en est en perpetuelle bonne odeur; com-

me au contraire l'infraction luy en est grandement honteuse. Et pource que vos peuples benissent Dieu de voir aujourd'huy ceste couronne alliee d'une double alliance avec l'Espagne, il est à esperer que des gages si precieux donnez de part & d'autre, seront autant de liens sacrez pour maintenir leur amitié inuio-
lable, & pour conseruer ces deux grandes Monarchies en perpetuelle concorde, afin que comme leur desunion a causé si long temps des pertes irreparables à la Religion & à l'Estat, leur bonne intelligence soit maintenant au support & à l'appuy de tous les deux. Non que pour cela vostre Maiesté doie moins s'entretenir avec ses autres Alliez, ains les ayant pour amis & procurant tousiours par voyes iustes, que le fort n'opprime le foible, la France se glorifiera du mesme bon heur que Themistocles donnoit à la terre qu'il vouloit vendre, disant (pour la bien louer) qu'elle auoit bon voisin.

Finalemēt, SIRE, encores que vous soyiez par dessus toutes les Loix humaines, & que ce ne soit à vos subiects de controller vos actions, si n'estes-vous pas dispensé des Loix diuines qui vous obligent à bien & droictement regner. C'est pourquoy si vous embrassez les vertus que i'ay osé vous représenter en ce discours, & que vous preniez la sincerité de mon affection en bonne part, vos peuples se transformeront selon l'innocence de vostre vie, tout ainsi qu'on voit qu'il y a de certaines plantes qui se tournent au mouuement du Soleil: Et encores que vous ayez tant plus de peine à bien regir, que vous estes successeur d'un bon Prince: si est-ce que viuant ainsi, nous esperons que vous ne cederez au Grand Henry vostre Pere: Vous serez beny de Dieu, sa main puissante sera le soutien de vostre Sceptre, ses Anges celestes seront à

l'entour de vous, comme vne forte legion destinée à la garde de vostre Maiesté: Mais parce qu'il est impossible de bien regner sans la vraye Sapience, vous la demanderez à Dieu, & luy direz avec le plus sage Roy Sap. qui a iamais esté au monde. Enuoye la des Cieux & du ca. 9. siege de ta gloire, afin qu'estant avec moy, elle s'employe à travailler, & que ie sache ce qui est agreable deuant toy. Car elle scait & entend toutes choses, & me conduira sagement en mes faicts, & me gardera par sa puissance, de sorte que mes œuvres seront bien receuës, & gouuerneray iustement ton Peuple, & me rendray digne du Throne de mes Peres.

F I N.



